

## **Oromo - Holy Spirit Scriptures**

**Exodus 35:31 Waaqayyo hafuura ofii isaatiin, ogummaadhaan, hubannaadhaan, beekumsa waan garaa garaa miidhagsanii hojjechuutiinis isa guuteera;**

**Namoota 11:25 Yommus Waaqayyo duumessa keessaan gad bu'ee, Museetti in dubbate; hafuura isa Musee irra ture irraas waa fuudhee maanguddoota torbaatama irra in kaa'e; isaanis yommuu hafuurri isaan irra boqote raajii in dubbatan, garuu itti fufanii ergasii raajii hin dubbanne.**

**1 Saamu'elitti 10:6 Yommus hafuurri Waaqayyoo humnaan siif in dhufa; ati immoo isaanii wajjin raajii in dubbatta; diddiiramtees nama kan biraan in taata.**

**2 Saamu'elitti 23:2 Inni, 'Hafuurri Waaqayyoo ana keessaan in dubbate, dubbiin isaa afaan koo keessa jira.**

**Iyoob 33:4 Hafuurri Waaqayyoo na uumeera, hafuurri inni hundumaa danda'u anatti baafate sunis ana in jiraachisa.**

**Isaayaas 11:2 hafuurri Waaqayyoo isa irra in buufata, innis hafuura ogummaatii fi hafuura hubanna ti, hafuura gorsaatii fi hafuura humnaa ti, hafuura beekumsaatii fi hafuura sodaa Waaqayyoo ti.**

**Miikiyaas 3:8 Ani garuu Yaaqoobitti irra-daddarbaa isaa, Israa'elitti cubbuu isaa himuudhaaf humna, hafuura Waaqayyoo, wanta dhugaa ta'e beekuu, ija jabina guutuus argadheera.**

**Zakaariyaas 4:6 Yommus ergamichi, ergaa isa Waaqayyo biraan dhufee Zarubaabelitti akka ani dubbadhuuf anatti in hime; ergichis, 'Hafuura kootiin malee humnaan miti, aangoodhaanis miti' kan jedhu ture; kana Waaqayyo gooftaa maccaatu dubbate.**

**Maatewoosiv 12:28 Ani garuu hafuura Waaqayyootiin hafuurota hamoota kanan baasu erga ta'ee, mootummaan Waaqayyoo isin irratti dhufeera.**

**Maatewoosiv 28:19 Egaa dhaqaa, maqaa abbaatii fi ilmaatti, kan hafuura qulqulluuttis isaan cuuphuudhaan, saba hundumaa bartoota koo godhaa!**

**Maarqoosi 1:10 Yohannis akkuma Yesus bishaanicha keessaa ba'een, bantiwwan waaqaa saaqamuu isaanii, hafuurri qulqulluunis akka gugeetti dhufee isa irra bu'uu isaa arge.**

**Maarqoosi 13:11 Isaan dabarsanii isin kennuudhaaf yommuu isin geessan, isa dubbachuuf jirtaniif dura hin yaadda'inaal! Waanuma yeroo sanatti isiniif kennamu dubbadhaa malee; isintu dubbata miti'o, hafuura qulqulluutu dubbata malee.**

**Luqaas 2:26 Kanaan duras fayyisaa gooftichaa isa abdachiifame utuu hin argin akka hin duune hafuura qulqulluudhaan isatti mul'ifamee ture.**

**Luqaas 4:1 Yesus hafuura qulqulluudhaan erga guutamee booddee**

**Yordaanosii deebi'ee, hafuuruma sanaan lafa onaa keessa guyyaa  
afurtama geggeeffame,**

**Luqaas 4:18-21 Inni, 'Hafuurri gooftichaa ana irra jira, sagalee misraachoo  
warra gadadamotti himuudhaaf na dibeera; warra booji'amanitti akka gad  
dhiifaman labsuudhaaf; warra jaamaniif agartuu isaanii deebisuudhaaf;  
warra cunqurfaman luba baasuudhaaf; 19 wagaa ayyana jaalala gooftaa  
labsuudhaaf na ergeera' kan jedhu ture. 20 Macaafichas maree, isa mana  
sagadaa sana keessa ergamutti kennee taa'e; warri mana sagadaa sana  
keessa turan hundinuus ija isaanii isa irratti irraanfatan. 21 Yommus  
Yesus, 'Kunoo, dubbiin macaafaa kun akkuma dhageessanitti har'a  
raawwatame' isaaniin jechuu jalqabe.**

**Luqaas 12:11,12 'Mana sagadaatti yookiis abboota biyyaatti, yookiis warra  
biyya seerratanitti yoo isin geessan, attamitti falmann? Yookiis maal  
jenna? jettanii hin yaadda'inna! 12 Yeroodhuma sanatti maal jechuun akka  
isiniif ta'u, hafuurri qulqulluun isin in barsiisa' jedhe.**

**Yohaannisi 7:38,39 Namni anatti amanu akkasuma haa godhu! Macaafni  
akkuma dubbate, "Yaa'aan bishaan jiraataa garaa isaa keessaa in burqa"  
jedhe. 39 Inni dubbii kana waa'ee hafuura qulqulluu, isa warri isatti  
amanan fudhachuuf jiraniif dubbate; inni iddo ulfina isaatti waan ol hin  
fudhataminiif, hafuurri qulqulluun amma iyyuu hin kennamne ture.**

**Yohaannisi 14:16,17 Ani abbaa nan kadhadha, inni bara baraan isin bira haa  
jiraatuuf, kan biraan kan isiniif dubbatu, isiniif in kenna. 17 Inni isiniif  
dubbatu kun, hafuura dhugaa ti; biyyi lafaa waan isa hin argineef isa hin  
beekneefis, isa fudhachuuf hin danda'u. Isin garuu, inni isinii wajjin waan  
turuuf, isin keessas waan jiraatuuf isa beekuuf jirtu.**

**Yohaannisi 14:26 Inni isiniif dubbatu hafuurri qulqulluun, inni abbaan maqaa  
kootiin ergu garuu, waan hundumaa isin in barsiisa, waanan isinitti hima  
hundumaas isin in yaadachiisa.**

**Yohaannisi 16:7,8 Dhuguman isinitti hima, yoon adeeme isiniif wayya; yoon  
adeemuu dhabaadhe inni isiniif dubbatu gara keessan hin dhufu; ani yoon  
dhaqe garuu isa isiniifan erga. 8 Inni yommuu dhufu waa'ee cubbuu,  
waa'ee qajeelummaa, waa'ee firdiis, biyya lafaa in hubachiisa.**

**Yohaannisi 16:13-15 Hafuurri dhugaa sun yommuu dhufu, gara dhugaa  
hundumaa keessatti isin in geessa; inni waan dhaga'u dubbata malee, of  
keessaa fuudhee hin dubbatu; waan dhufuuf jirus isinitti in mul'isa. 14  
Dubbii koo keessaa fuudhee waan isinitti mul'isuuf, inni anaaf ulfina in  
kenna. 15 Waan abbaan qabu hundinuu kan koo ti; kanaafan inni dubbii  
koo keessaa fuudhee isinitti in mul'isa, jedhee isinitti dubbadhe' jedhe.**

**Yohaannisi 20:21,22 Yesus ammas itti deebi'ee, 'Nagaan isiniif haa ta'u'  
isaaniin jedhe; itti fufees, 'Abbaan akkuma ana erge, ani immoo isin nan**

**erga' jedhee isaanitti dubbate. 22 Kana jechaa hafuura isaanitti baafatee, 'Hafuura qulqulluu fudhadhaa!**

**Hujii Ergamtootaa 1:2 Kunis immoo jalqaba isaatii kaasee, hamma guyyaa inni ergamoota isaa warra fo'ate hafuura qulqulluudhaan abboomee, gara waaqaatti ol fudhatameetti kan ta'ee dha.**

**Hujii Ergamtootaa 1:5 Itti dabalees, 'Yohannis bishaaniin cuuphe, isin garuu guyyaa baay'ee utuu hin turin hafuura qulqulluudhaan in cuuphamtu' jedhe.**

**Hujii Ergamtootaa 1:8 Isin garuu, hafuurri qulqulluun yommuu isin irra bu'u, humna in godhattu; Yerusaalemitti, Yihudaa hundumaatti, Samaariyaatti, hamma andaara lafaattis dhuga-baatuu koo in taatu' isaaniin jedhe.**

**Hujii Ergamtootaa 2:1-4 Ayyaanni guyyaa shantamaffaa inni 'Phenxeqostee' jedhamee beekame yommuu ga'e, hundinuu iddo tokkotti walitti qabamanii turan. 2 Dingatas huursaan waaqa irraa akka bubbbee bubbisuutti dhaga'amee, manicha isaan keessa jiranis guute. 3 Arraba ibiddaa kan fakkaatan isaanitti mul'atan, gargar tamsa'aniis, wanti akka arraba ibiddaa kun tokkon tokkon isaanii irra taa'an. 4 Yommus hundumti isaanii hafuura qulqulluudhaan guutaman; akka hafuurri dubbachuu isaa isaaniif kenneti, afaan garaa garaa dubbachuu jalqaban.**

**Hujii Ergamtootaa 2:17-19 "Guyyaa gara dhumaatti akkana in ta'a jedha Waaqayyo, foon-qabeessa hundumaaf hafuura koo nan kenna, ilmaan keessanii fi intaloonni keessan raajii in dubbatu; dargaggooni keessan mul'ata in argu, maanguddooni keessanis abjuu in abju'atu. 18 Eyyee, guyyota sanatti hojjetoota koo warra dhiiraa fi dubartiidhaaf hafuura koo nan kenna, raaajiis in dubbatu. 19 Wanta dinqisiisaa ol waaqa irraa, milikkitas gad lafa irraa, dhiigaa fi ibidda, aara lafa gurraachessus nan argisiisa; (Yo'el 2:28,29)**

**Hujii Ergamtootaa 2:33 Inni gara mirga Waaqayyoo abbaatti ol fudhatamee, hafuura qulqulluu isa abdachiifamee ture abbaa biraa fuudhee erge; kan isin amma argitanii fi dhageessan kun isa.**

**Hujii Ergamtootaa 2:38 Phexros immoo, 'Yaada garaa keessanii geddaradhaa; cubbuun keessan akka isiniif dhiifamuuf, tokkon tokkon keessan maqaa Yesus Kristositti cuuphamaa; kennaa hafuura qulqulluus in fudhattu.**

**Hujii Ergamtootaa 4:31 Isaan kadhata afaanii fixuunii fi iddoon isaan itti walitti qabaman socho'uun, wal faana ta'e. Hundumti isaaniis hafuura qulqulluudhaan guutamanii, dubbii Waaqayyoo ija jabummaadhaan dubbachaa turan.**

**Hujii Ergamtootaa 8:15-17 Isaan Samaariyaatti gad bu'anii, hafuura qulqulluu akka argataniif amantootaaf kadhatan. 16 Maqaa gooftaa Yesus duwwaatti cuuphamanii turan malee, hafuurri qulqulluun isaan keessaa nama tokko irratti illee hin buune. 17 Ergamoonni harka isaanii isaan irra kaa'an, isaan immoo hafuura qulqulluu argatan.**

**Hujii Ergamtootaa 8:39 Bishaanicha keessaa yommuu ba'an, hafuurri gooftaa  
Filiphosin butee, fuudhee adeeme. Namichi deebi'ee isa hin argine; haa  
ta'u iyyuu malee, karaa isaa itti fufee gammadaa adeeme. (1 Moototaa  
18:12)**

**Hujii Ergamtootaa 9:31 Yeroo sana keessa waldaan amantootaa Yihudaa,  
Galiilaa, Samaariyaa hundumaa keessatti nagaa argattee, ijaaramte;  
sodaa gooftaatti jiraachaa, jajjabina hafuura qulqullutiiniis baay'achaa  
turte.**

**Hujii Ergamtootaa 10:44,45 Utuu Phexros dubbii kana itti himaa jiruu,  
hafuurri qulqulluun warra dubbicha dhaga'an hundumaa irratti bu'e. 45  
Warra Yihudootaa keessaa amantoonni Phexrosii wajjin Yopheedhaa  
dhufan, kennaan hafuura qulqulluu saba Waaqayyoo warra hin ta'iniif  
kennamuu isaa arganii, akka abjuu ta'an.**

**Hujii Ergamtootaa 11:15 Yeroo ani dubbachuu jalqabetti hafuurri qulqulluun,  
akkuma jalqaba nu irratti bu'etti, isaan irra bu'e.**

**Hujii Ergamtootaa 13:52 Haa ta'u iyyuu malee, amantoonni mandara  
Anxokiyaa gammachuudhaa fi hafuura qulqulluudhaan guutamanii turan.**

**Hujii Ergamtootaa 19:6 Yeroo Phaawulos harka isaa isaan irra kaa'etti  
hafuurri qulqulluun isaan irratti bu'e; isaan afaan hin beekamneen  
haasa'an, raajiis in dubbatan.**

**Hujii Ergamtootaa 20:23 Hafuurri qulqulluun garuu, hidhamuunii fi  
dhiphachuun akka ana eeggatu, mandara ani ga'e hundumaatti anatti  
mul'iseera.**

**Roomaatti 5:5 Sababii Waaqayyo, jaalala isaa isa karaa hafuura qulqulluu  
nuuf kennname, garaa keenya keessatti dhangalaaseef, abdiin immoo nu  
hin yeellaasisu.**

**Roomaatti 8:9 Hafuurri Waaqayyoo yoo dhuguma isin keessa jiraate, isin  
akka fedha hafuuraatti malee akka fedha fooniitti hin jiraattan; namni  
hafuura Kristos of keessaa hin qabne, kan Kristos miti.**

**Roomaatti 8:13-16 Akka fedha fooniitti yoo jiraattan du'uun keessan  
beekamaa dha, hafuuraan hojii namummaa keessan isa foonii yoo  
ajjeeftan garuu in jiraattu. 14 Warri hafuura Waaqayyootiin geggeeffaman  
hundinuu ilmaan Waaqayyoo ti. 15 Hafuurichi isin fudhattan hafuura  
ilmummaatti guddifamuu ti malee, hafuura garbummaa isa sodaa jalatti  
isin deebisu miti; hafuura kanaanis, 'Abbaa keenya' jennee Waaqayyoon in  
waammanna. 16 Hafuurri Waaqayyoo hafuura keenyaa wajjin walii galee,  
ijoollee Waaqayyoo ta'uu keenya dhugaa in ba'a.**

**Roomaatti 8:26 Hafuurichis immoo akkuma kanatti dadhabpii keenyatti nu  
gargaara; nuyi maal kadhachuun akka nuuf barbaachisu akka ta'utti hin  
beeknu; hafuurichi garuu aaduu isaatiin karaa namni dubbiidhaan mul'isuu  
hin dandeenyeen nuuf in kadhata.**

**Roomaatti 15:13 Humna hafuura qulqulluutiin abdiitti guddachaa akka adeemtanitti, Waaqayyo inni abdii namaaf kennu, isatti amanuu keessaniin gammachu fi nagaa hundumaan isin haa guutu!**

**Roomaatti 15:19 Kan inni raawwates humna milikkitootaa fi dinqii baay'eetiin, humna hafuura qulqulluutiinis ture; kanaafan Yerusaalemii jalqabee naanna'ee hamma Iliiriqumitti guutummaatti wangeela Kristos lallabuu danda'e.**

**1 Qorontoosiitti 2:10-13 Waaqayyo garuu hafuura qulqulluudhaan isa kana nutti mul'ise; hafuurri qulqulluun waan hundumaa, yaada Waaqayyoo isa gad fagoo jyyuu qoree bira in ga'a. 11 Waan yaada namaa keessa jiru, hafuuruma namicha keessa jirutu beeka malee, namni biraa beekuu hin danda'u; akkasumas hafuura Waaqayyoo malee, eenu illee yaada Waaqayyoo hin hubatu. 12 Ammas nuyi kenna Isa Waaqayyo biraa nuuf kenname beekuudhaaf, hafuura Isa Waaqayyo biraa dhufe fudhanne malee, hafuura biyya lafa kanaa hin fudhanne. 13 Kanaafis nuyi dubbii hafuura warra hafuuricha argataniif waan hiiknuuf, Isa dubbannu barsiisa hafuurichaatiin malee, barsiisa ogummaa namaatiin hin dubbannu.**

**1 Qorontoosiitti 3:16 Isin mana qulqullummaa Waaqayyoo akka taatan, hafuurri Waaqayyoos isin keessa buufatee akka jiru hin beektanii ree?**

**1 Qorontoosiitti 6:11 Isin keessaa kaan warra akkasii turan, garuu maqaa gooftaa Yesus Kristosiin, hafuura Waaqayyo keenyaatiinis cubbuuttii dhiqattaniittu, warra Waaqayyoof qulqullaan taataniittu, Waaqayyo durattis qajeelota taataniittu.**

**1 Qorontoosiitti 12:3 Akkasumas namni hafuura Waaqayyootiin geggeeffamu, 'Yesus abaaramaa dha' jechuu, namni tokko illes hafuura qulqulluutiin yoo ta'e malee, 'Yesus gooftaa dha' jechuu, akka hin dandeenye cimsee isinittan beeksisa.**

**2 Qorontoosiitti 3:17 Egaa inni 'Goofticha' jedhame kun, hafuura qulqulluu dha; iddo hafuurri gooftichaa jiru immoo, birmadummaatu jira.**

**2 Qorontoosiitti 13:14 Ayyaanni gooftaa Yesus Kristos, jaalalli Waaqayyoo, tokkummaan hafuura qulqulluus hunduma keessanii wajjin haa ta'u!**

**Galaatiyaatti 4:6 Isin ilmaan isaa ta'uu keessan argisiisuudhaaf, Waaqayyo hafuura ilma isaa Isa, 'Abbaa, abbaa' jedhee waammatu garaa keenya keessatti erge.**

**Efesooniitti 1:13,14 Isinis immoo ergaa dhugaa, wangeela fayyina keessanii karaa isaa dhageessan; isin warri dhageessanii itti amantan, hafuura qulqulluu Isa abdachiifameen mallateeffamtaniittu. 14 Hafuurri qulqulluun immoo warri kan Waaqayyoo ta'an galata ulfina isatiif yeroo furamanitti wanta nuyi argachuuf jirruuf qabdii keenya.**

**Efesooniitti 2:18 Nuyi lamaanuu hafuuruma tokkoon karaa isaa akka itti abbaa bira geenyu qabna.**

**Efesooniitti 4:30 Hafuura Waaqayyoo isa qulqulluu, isa guyyaa fayyinaatiif  
ittiin mallateeffamtan hin gaddisiisinaa!**

**1 Tasaloonqeetti 4:8 Egaa namni gorsa kana tuffatu, Waaqayyoon isa hafuura  
isaa qulqulluu isiniif kenu tuffata malee, nama tuffata miti.**

**1 Tasaloonqeetti 5:19 Hafuura qulqulluu hin ukaamsinaa!**

**2 Tasaloonqeetti 2:13 Obboloota warra gooftaadhaan jaallatamatnii,  
hafuuraan qulqulleeffamuudhaan, dhugichattis amanuudhaan akka  
fayyitaniif Waaqayyo warra jalqabaa godhee waan isin fo'ateef, nuyi  
waa'ee keessaniif yeroo hundumaa Waaqayyoon galateeffachuun nuuf in  
ta'a.**

**Tiitootti 3:5,6 Waaqayyo hojii nuyi qajeelummaadhaan hojenneef utuu hin  
ta'in, akka araara isaatiitti dhiqannaa lammaffaa dhalachuutiin, haareessuu  
hafuura qulqullutiiniis nu fayyise. 6 Hafuurichis isa inni karaa Yesus  
Kristos fayyisaa keenyaa arjummaadhaan nu irratti dhangalaasee dha.**

**Ibrootaatti 2:4 Kana irrattis Waaqayyo ofii isaatii milikkitaa fi wanta  
dinqisiisaa karaa garaa garaas hojii aangoo hojjechuudhaan, akka jaalala  
isaatti kenna hafuura qulqulluu hiruudhaan, duukaa bu'ee dhugaa ta'uu  
isaa mul'iseera.**

**Ibrootaatti 10:15 Hafuurri qulqulluunis immoo waa'ee kanaa dhugaa nuuf  
ba'a.**

**1 Pheexiroosi 1:2 Isin akka akeeka Waaqayyoo abbaatti, Yesus Kristosiif  
abboomamuuf, dhiiga isaatiinis qulleeffamuuf, hafuura qulqulluudhaan  
qulqulleeffamtanii fo'amtaniittu. Ayyaannii fi nagaan isiniif haa baay'atu!**

**2 Pheexiroosi 1:21 Raajii dubbachuun takkaa jaalala namaatiin hin taane;  
garuu namoonni hafuura qulqulluudhaan geggeeffamanii, wanta Waaqayyo  
biraa fudhatan dubbataniiru.**

**1 Yohaannisi 4:2 Hafuurri, Yesus Kristos fooniin dhufuu isaa amanatee  
beeksisu hundinuu kan Waaqayyoo ti; kanaanis hafuura Waaqayyoo ta'u  
isaa in hubattu.**

**1 Yohaannisi 5:7,8 Dhuga-baatuu sadiitu jira. 8 Isaan kunis hafuuricha,  
bishaanicha, dhiigicha, sadanuus sagalee tokkoon dhugaa ba'u.**

**Yihuudaan 1:20 Isin garuu michoota ko, amantii keessan isa hundumaa  
caalaa qulqulluu irratti dhaabamaatii cimaa! Hafuura qulqulluudhaan  
geggeeffamaatii kadhadhaa!**